

Freddy Refunjol : “Ta wordo bisá cu politiek ta sushi, pero politiek ta loke abo haci di dje”

ORANJESTAD- Awe Bon Dia Aruba ta papia cu sr. Freddy Refunjol. Un político ambicioso y dedicá cu a yega di ocupá e cartera di Minister di Enseñanza. Nunca tabata intencion di Freddy pa drenta den política, pero una bes cu el a dicidí pa afiliá su mes na e partido MEP el a tuma su encargo hopi na serio y a traha semper segun su consenshi. Su señora y su jiuun semper a para banda di dje y a apoyé den su decisionnan, mescos cu su famia y e barrio na unda el a lanta, cu ta Savaneta. Savaneta a carga Freddy den su scochi y ta contento y orguyoso di su jiu. Sera concoci cu un poco mas di e simpático Freddy Refunjol, number 3 riba e lista di e partido geel.

BDA: Ki edad bo tabatin ora bo a drenta política?

FR: 32 año.

BDA: Dicon bo a drenta política y pakiko MEP?

FR: Laga mi cumenzá na bisa cu antes nunca mi a mete cu política. Mi tabata un persona a-político. Mi famia a vota pa MEP si desde e promé año cu MEP a wordo fundá. Mi tata tabata gusta política masha hopi mes. El a traha masha duro den barrio pa MEP, campaña etc. Semper el a sigui política di aserca. Promé cu partido MEP a bin, e tabata interesá den PPA, pero tambe e tabata interesá den e política di Venecuela. Manera mi a bisa caba

ami mes nunca tabata mete cu política, claro cu mi a yega di corre den parada cu bandera, pero te eynan mi interes a yega. E promé partido cu e yega di asercami pa afiliá na nan tabata partido AVP, pa medio di sr. Tico Kock, kende por cierto ta un bon amigo di mi. Sr. Joe Rasmijn di MEP tambe a purba di motiva mi pa mi drenta política, pero manera mi a bisa caba mi no tabata interesá den esaki.

Mi tabata simpatizá cu MEP, e lucha di Status Aparte, e ideología Social Demócrata. Un Diaranson mainta na 1983, den pause na school (Freddy Refunjol tabata maestro na Heilig Hart School na Savaneta red.) mi a wordo yamá dor di Betico Croes. El a bisami cu MEP ta buscando un candidato pa Savaneta. Ami, cu no a catch cu e tabata kier men pa ami subi lista, a duné number 1 dos otro persona. Betico a bisami e ora cu ta cumi e kier papia y a invitami pa un reunion e mesun anochi ey na un hotel. Mi a contesté cu lo mi bin cu mi casá, pasobra mescos cu ami e tampoco no tabata interesá pa mi drenta política.

BDA: Cu ki intencion bo a bai e reunion ey?

FR: Wel, bayendo e reunion ey ami ta bisa mi casá cu mi no ta interesá pa bai riba lista. Nos a sigui discutí e asunto y nos tur dos tabata di opinion cu nos no ta interesá. Cu e opinion ey nos a yega e reunion. Eynan nos a papia cu Betico y mi mester bisa cu el a convencemi, pasobra cu ora mi a sali di eyden mi a firma. E cos mas

gracioso di henter e asunto aki ta cu ora mi ta yegando Savaneta mi a realizá cu mi a lubidá di puntra ta cua number mi a haya. Mi a firma sin sa cua number mi a haya. Den corant mi a lesa cu mi a haya number 20.

E tempo ey Booshi Wever y Edison Briesen tambe a drenta política.

BDA: Nunca bo a arrepentí bo decision?

FR: No, no. Política ta algo educativo, maske cu dor di dje bo ta hiba un bida hopi agítá si. Y e ta bai a costo di bo famia tambe.

BDA: Bo famia, bo casá y jiuun a apoyabo den bo decision?

FR: Sigur cu si. Nan a sostenemi “all the way”. Mi casá semper a consehami bon, e ta un persona hopi straight y masha crítico mes. Nos ta discutí política hopi cu otro.

BDA: Cuanto vota bo a haya promé biaha cu bo bai riba lista?

FR: 359 voto. Mirando e posicion cu mi tabatin, number 20 y e campaña relativamente corto - mas o menos 1 luna - mi ta haya cu mi a haya hopi voto y mi tabata satisfecho.

BDA: Promé biaha cu bo a subi lista bo tabata pues number 20. E siguiente eleccion ki posicion bo a haya?

FR: Den e siguiente eleccion

na 1985 mi a haya posicion number 7. MEP tin e sistema cu cada distrito ta wordo representá den e promé 12 personanan riba lista. E año ey mi a haya 665 voto. E tempo ey prácticamente tur hende riba lista di MEP a bai atras den voto y ami a redoblá mi votonan.

BDA: Mi a comprendé cu ora bo bai vota hopi hende mes ta compañabo.

FR: Masha hopi hende mes. Mi barrio ta sostenemi masha bon mes. Mayoría di mi votonan ta bin for di Savaneta y vecindario.

BDA: “Van huis uit” bo ta un maestro di school. Bo a ocupá tambe e cartera di Minister di Enseñanza. Esaki pa bo tabata un reto?

FR: Sigur cu si. Tabatin un impase den enseñanza. Na 1987-1988 notanan a wordo trahá pa mi antecesor Mito Croes y nan tabata contené hopi cosnan bon, pero tambe tabatin algun tópiconan cu tabata irealistico. Nos a ehecutá loke nos a kere cu tabata bon y tabata posibel, pasobra e parti financiero tabata un problema grandí pa nos enseñanza. Tur cambio ta bai cu miyones y miyones. Si bo wak p.e. EPB, cu ta un proyecto di mi, ta e proyecto mas grandí den enseñanza cu hamas antes a yega di tuma lugá na Aruba, y e suma ta demostrá esey, 35 pa 45 miyon. Aruba su mes for di su presupuesto nunca lo por a produci e placa aki. Pues bo ta dependé hopi di Hulanda kiko bo ta haya na ayudo.

Hopi cos mes a wordo haci den enseñanza den mi período como Minister di Enseñanza. Mi por bisa cu nos a cende e mecha, e ta continuá awor. Ora mi a drenta Parlamento bek mi a bisa den mi discurso cu e minister aki y esun despues di dje y esnan despues di dje tin un halá di trabao pa haci.

Pasobra manera mi a bisa enseñanza tabata hopi pará.

BDA: Con bo ta haya cu Enseñanza ta bayendo awor?

FR: E ta bayendo bon, pero toch ta bai tin hopi problema mes. Nos tin un dicho ta bisa “Sòpi purá ta sali salo”. Tin mucho cos ta pasando aworaki pareuw y e mankracht ta hopi limitá. Mi a yega di bisa y mi ta bisa un biaha mas cu mi ta kita mi sombré pa e hendenan di Directie Onderwijs. Si bo wak eynan, bo ta mira hendenan cu ta traha hopi duro, nan ta sloof nan mes uit pa trece e cambionan. Pero al fin al cabo ta hende nan ta, y si bo tin 5 pa 6 año ta traha extra oranan ta yega un momento cu bo no ta wanté. Ta un grupo chikito mester carga henter e proceso di renovacion. Aunque cu bo kier envolvé henter e field, toch semper ta un grupo núcleo ta esun cu ta carga e proyecto.

BDA: Dicon abo como minister di Enseñanza nunca a traha riba introduccion di “leerplicht”?

FR: E no tabata un prioridad aki na Aruba. Bo por bisa cu 99.9% di e muchanan tabata bai school y sigur te cu seis klas. E tabata un discusion cu

nos a hiba den Parlamento na año 1990 unda a wordo bisá cu ningun caminda na mundo tabatin “leerplicht” riba 15-16 año.

BDA: Kiko bo te pensa awe di un leerplicht?

FR: Aworaki mi ta kere cu mester cumenzá wak den e direccion ey. Pero tin hopi otro problema cu ta bin aserca. Leerplicht no ta e ley riba e school so. Si gobierno ta obligá un mucha bai school, bo mester percurá pa e mucha tin alimentacion y paña tambe. Pues cu e introduccion di leerplicht gobierno ta haya un tarea extra.

BDA: Kiko bo ta opiná di e muchanan cu ta ilegal aki na Aruba y cu no ta bayendo school?

FR: Eta un peligro grandísimo cu nos tin na Aruba, pasobra e ta un grupo grandi di mas o menos 1000 mucha cu ta jiuun di ilegal cu tambe ta ilegal aki na Aruba. Pe e motibo aki nan no ta wordo aceptá na ningun school. Pa por wordo aceptá na school bo mester tin un permiso di estadía.

BDA: Pakiko bo ta papia di peligro?

FR: Mi ta bisa peligroso, pasobra cu e ta un grupo relativamente grandi di muchanan entre 12 pa 17 año. Esaki ta bai trece delincuencia cuné, pasobra nan no tin nada di haci, y ora un hende no tin nada di haci e ta sinta pensa maldad pa haci. E hobennan aki no por

wordo envolví den nada ya cu ta ilegal nan ta. E ta un tijdbom y mester haci algo na e fenómeno aki.

BDA: Bo a yega di pensa pa bandoná política?

FR: Una vez cu bo a cumenzá cu política bo ta bira adicto na dje. Mi tin cu bisa cu tin biaha bo ta haya frustracion den política, tanto como gobernante cu como parlamentario. Si mi wak bek riba mi promé tres año como parlamentario e tabata un período masha bunita unda mi a siña hopi. Bo ta siña con bo comunidad ta hincá den otro y con bo país ta wordo goberná. E frustracion e tempo ey tabata ta cu bo ta bin cu yen di sugerencianan cu bo ta kere cu ta na bienestar di bo país, pero ora bo trecé den parlamento e ta wordo “weggestemd”. Esey ta momentonan cu mi ta pensa si ta valé la pena pa keda den politik.

Pero como gobernante tambe bo ta bin cu hopi ideanan, pasobra mi ta kere cu tur hende cu drenta política bo ta drenta cu cierto metanan, y como gobernante bo ta haya frustracionnan tambe. P.e. e gymzaal di Colegio Arubano ta un proyecto di mi. Nos a dicidí di lo traha e sportzaal aki di nos mesun presupuesto. Ora nos a tuma e decision ey y a hasta anuncié den conferencia di prensa, nos a wordo yamá dor di KabNa cu a bisa nos cu ya cu ta trata di enseñanza nan ta dispuesto pa cubri e gastonan. Tur cos a bai bon pa e proyecto aki te cu e momento a bin e problema di estructura di maneho, kende lo bai manehá e

luga. Anto riba algo asina futil e cos a pega. Pa e motibo aki henter e proyecto a stagna. Ami ta hopi contentu cu e proyecto ta wordo finalizá awor, pero cu esaki mi kier ilustrá cu como gobernante tambe bo ta wordo limitá pa x motibo.

Pero di otro banda mi ta satisfecho di e proyectonan cu a wordo lográ. E inovacionnan den enseñanza cu ta tumando lugá ta un continuacion cu nos gobierno a iniciá. Y esaki pa Aruba ta importante. Aruba ta riba bon caminda pa loke ta trata enseñanza y mi ta contento cu esey.

BDA: E restructuracionnan cu a tuma lugá den partido MEP a wordo haci bao bo encargo. Drentando den pueblo kiko ta algo cu bo a ripará?

FR: Un reclamo cu partido MEP a haya ta cu e hendenan ta bisa cu e contacto cu e gobernante no ta optimal. Ciertu momento ora bo drenta den gobierno tin un distancia. Locual cu ta lógico, pasobra un minister ta traha, sigur den cuminzamento, 10 pa 12 ora pa día.

Dor di e peso di trabao bo no ta haya chens pa ta asina cerca di pueblo, aunque mi tin cu bisa si cu mi a atendé masha hopi hende mes durante mi periodo como minister. Y hopi biaha bo no tin solucion 1-2-3 pa hende tampoco.

Den e restructuracion di partido nos a crea un mecanismo cu e contacto cu pueblo mester ta mas regular, sea cu nos ta den gobernacion of sea cu nos ta den oposicion.



BDA: Bo no ta kere cu e funcion di un staatsecretaris ta kita poco di e peso di e trabao di un minister?

FR: Originalmente expertonan cu a traha e estructura pa nos cu mester a bin despues di Status Aparte, a pone bon cla cu pa e carteranan di Bienestar General y Husticia mester bin cu staatsecretaris. Ta pesey mes a bin cu e versplintering, pasobra cu p.e. Deporte y Salubridad mester cai bao di Bienestar General, pero dor cu e trabao ta bira asina hopi y inhumano cu a bin cu e reparticion.

BDA: Bo tin un mensahe pa e hobennan cu lo kier drenta den política activo na Aruba?

FR: Mi ta spera cu hopi hoben profesional drenta política na

Aruba. E ta bon y di e manera ey bo por hiba bo país dilanti.

Ta wordo bisá cu politiek ta sushi, pero politiek ta loke abo haci di djé. Mi tin 13 año den politiek y tur ésnan cu tabata conocemi promé cu mi a drenta política dor di mi actividadnan social y deportivo, conocemi ainda como es mesun hende. Hopi di mi amigonan di e tempo ey ta mi amigonan di awe. Claro cu den cierto aspecto bo ta pasobra cu p.e. Deporte y Salubridad mester cai bao di Bienestar General, pero dor cu e trabao ta bira asina hopi y inhumano cu a bin cu e reparticion.

Entrevista: Myriam Croes.